

# Titah Sultan Sharafuddin ikhlas

UNIVERSITI Putra Malaysia (UPM) merasa amat kecewa dan sedih dengan tindakan individu yang merendah-rendahkan titah ucapan Tuanku Canselor, Sultan Sharafuddin Idris Shah (**gambar**) pada Majlis Konvokesyen UPM baru-baru ini melalui platform blog.

Sesungguhnya tindakan individu berkenaan tidak wajar dan mempunyai agenda halus yang tersirat, selain tidak menghormati institusi di raja dengan menyalahgunakan kebebasan bersuara tanpa asas.

UPM menyokong penuh titah ucapan Tuanku Canselor, Sultan Sharafuddin Idris Shah agar pelajar memberi fokus kepada akademik, menjadi warga yang bertanggungjawab dan mempamerkan sahsiah contoh kepada masyarakat, selaras dengan kedudukan mereka sebagai golongan terpelajar.

Nasihat baginda supaya pelajar tidak terlibat dengan gejala negatif dan supaya berani untuk mencipta inovasi ke arah meningkatkan kualiti hidup serta menerapkan budaya

dan teras jati diri masyarakat Malaysia yang lebih cemerlang amatlah bertepatan dengan situasi semasa yang penuh cabaran.

Nasihat tersebut juga adalah selari dengan hasil pembelajaran yang diterapkan di dalam semua kursus UPM yang memberi penekanan kepada antara lain etika dan moral, keusahawanan, pemikiran kritis dan penyelesaian masalah supaya graduan yang dikeluarkan akan menjadi graduan 'functional' yang dapat memberi sumbangan dan impak kepada kemakmuran dan kemajuan masyarakat dan negara.

Pelajar universiti sebagai bakal pemimpin masa hadapan sewajarnya memperkasa semangat patriotik dan sayangkan negara sesuai dengan kedudukan mereka yang menjadi role model kepada masyarakat. Pelajar juga seharusnya menghormati institusi di raja yang menjadi payung rakyat dan tidak seharusnya



mengaitkan titah Tuanku dengan agenda tertentu.

UPM tidak mengongkong pelajar menyatakan pendirian terutamanya yang melibatkan kebijakan pelajar asalkan ia dibuat melalui saluran yang betul dan tidak merosakkan imej universiti dan negara. Terbaharu, pandangan pelajar juga diminta untuk

pelan pembangunan tanah UPM serta inisiatif untuk mempertingkatkan kemudahan untuk kebijakan pelajar.

Tuanku Canselor amat rapat dengan universiti dan amat memberikan penekanan terhadap penerokaan ilmu pengetahuan dalam membangunkan masyarakat yang seimbang, maju dan lestari.

Sekiranya diteliti titah Tuanku Canselor pada Majlis Konvokesyen UPM ke-36, jelas Tuanku merupakan seorang yang berwawasan dan berpandangan jauh serta tidak mempunyai kepentingan peribadi dan politik

yang sempit dan merugikan terutama kepada para pelajar yang sedang menuntut ilmu di universiti.

Kampus universiti wajar bebas daripada pengaruh mana-mana parti politik dan kepentingan politik yang mengganggu kestabilan suasana kampus yang ceria, memupuk idealisme pelajar bagi menjadi pemimpin yang berwibawa dan matang dalam pertimbangan serta mendasarkan keputusan kepada sesuatu yang bersifat ilmiah dan penyelidikan dan boleh menyokong keputusan yang dibuat.

Penekanan Tuanku adalah pemikiran strategik yang tidak hanya mementingkan keuntungan jangka pendek tetapi kepentingan yang berimpak tinggi dan jangka panjang. Kematangan ini bakal diterjemahkan kepada graduan yang akhirnya bersedia untuk berada di lapangan sebenar dengan persediaan yang berteraskan kepada ilmu pengetahuan.

Dalam konteks UPM, pelajar mempunyai saluran untuk menyuarakan pendapat dan pandangan me-

reka dan untuk itu, kejadian seperti demonstrasi jalanan adalah kurang sesuai untuk diamalkan dan dijadikan sebagai satu-satunya pilihan untuk menyuarakan pandangan pelajar terhadap apa juga yang berlaku di sekeliling mereka.

Pelajar dan orang ramai amnya harus terbuka dan menerima serta tidak patut mempersoalkan pandangan dan nasihat yang berguna untuk kebaikan bersama, apatah lagi jika mengaitkan titah Tuanku dengan sesuatu yang langsung tidak berkaitan dengan keperibadian baginda.

Walaupun jelas titah baginda neutral melangkaui kepentingan politik mana-mana pihak, adakah individu blogger terbabit mempunyai agenda peribadi dan politik kerana siapa yang makan cili, dia yang terasa pedasnya. Kita wajar bijaksana dan matang menilai mengikut konteks yang dimaksudkan oleh Tuanku.

**DATUK IR. DR. RADIN UMAR  
RADIN SOHADI**

Naib Canselor Universiti Putra Malaysia